

Jü Carta San Pablota Guosa Huëpo Jiojtekähui Jume Tesalonisensemehui

Teboteri

¹ Ínapo, Pablo, Silvano, entok Timoteo, Jesucristota súalhuäpo náu aanim pueblo Tesalónicapo jomemmeute tebote, huame yü tütti itom Dios Átchai anhuäpo entok itom Señor Jesucristotamaki:

² Tühua entok yánti jíapsihuame Dios itom Áchay entok itom Señor Jesucristota bétana enchimneu ayunake.

Dios jume kaa tühuata yáalammet bétte nokta ámet chúpanake, Cristota yepsako

³ Jíbate Diosta baisaupo yúmala, enchim béchïbo, hermaanom, Diosta éä pámani, juka Diosta enchim súalë béchïbo enchimmet ä yötu tíaka, entok jü yore nákuhame huatem béchïbo enchimmet juebénasime.

⁴ Júnélite ítapo enchim bétana két ito jábele, jume huate Jesucristota súalhuäpo náu anim násuku, Diostat ára boobit-huamta enchim jípurëhui, entok Dios éehuamta enchimmet ayukä béchïbo. Bueitukem jiokot aneka, entok guok jájjahuaka junne, kaa huanti jíápsekem yánti aane.

⁵ Ímï jünakiachi jü Diosta bétte noki lútula huëpo. Bueituk ínëlem Áamak ä áttiaka

tahuanake, juka téhuekapo Diosta reytaka nésahuepo, hua enchim Áa béchïbo jìokot máchiraata bíchakähui.

⁶ Bueituk türi Diosta bíchäpo huame jìokot máchiraata enchim bíttuakame, bempom két jìokot máchiraata bítpo yúmala.

⁷ Eme éntok jìokot máchiraata bíchakame, ito bénasi jimyorehuamta enchim miknake, huám itom Señor Jesústa téhuekapo áu yeu machiriako, huame Diosta ángelesim útteata jípuremmak náuhui,

⁸ jum táijta béetëpo Diosta kaa súalekame kaa tühuaata mabet béchïbo, éntok huame kaa ä súalekame, huaka tü nokta itom Señor Jesucristota bétana huémta.

⁹ Huámëi éntok jíba béchïbo emo tärunake, Señorita anëpo yeu béeptaka, ä úttiära éntok ä ujjória ayukäpo,

¹⁰ huäri taahuarit Áapörík äbo kóm yepsayo ä yörinä béchïbo huame yeu púarim násuku, éntok ä úttilnä béchïbo huame sime ä súalekame násuku; bueituk emëe huaka itom Áa bétana nokakähuem súalek.

¹¹ Huäri béchïbote két Diostau nooka enchim béchïbo, Diosta tü éäu enchim ä núrukäpo yúmalasi bínnakë béchïbo. Ä súalhuame éntok enchimmet ayunake, ä úttiärayi.

¹² Ínëli itom Señor Jesucristota téhuam enchimmet yörina, eme éntok Áapöríkuchi, itom Dios éntok Señor Jesucristota tü éeri enchimneu bíchaa jípurë béchïbo.

2

Juëna yóremta yeu machinakëhui

¹ Én éntok, hermaanom, enchimmeute nooka, itom Señor Jesucristota yebijnakëhui entok itom áu náu yáijnake bétana:

² Jum enchim éeripem kaa läulauti täbuiasi éiya kaa náa múksi sékána bícha, éntokem täbui espírituta bétana kaa emo náyotebo junne, nokhuäpo entok jiojteripo junne, ito bétana ä huë tía bénasi, juka itom Señor át yebijnakeu taahuata kaa mékka bëyeu bétana nokamta.

³ Kaabe kía enchim bäitäunake; bueituk kaibu bát yebijnake, ál-la bátchu, jü Diosta béj-reka anhuame; entok áu yeu machirianake, hua juëna yóreme, jü emo täruhuäpo usiari.

⁴ Huäri síme jü Diosta bétana huémta béj-reka áu tóboktia, entok áy ä yörihuäu béj-re. Diosta tiöpopo júne két yejteka, áu Dios tíanake.

⁵ ¿Jachem kaa áu huáate, enchimmak aneka íä bétana ín enchimmeu nokaïbehui?

⁶ Én éntokem béja jüneiya, jita béchïbo kaa áu yeu ä machiriähui, bueituk áu ä täyatebonakeu taahuari yúmanake.

⁷ Bueituk béja éhuil tekipanua, hua juënakuu Diosta béj-reka huéeme; entok jíba junëli tekipanuanake, huaka áabia kíktelamta yeu huíkhuäu tájti.

⁸ Huanäi ál-la áu yeu machirianake, hua juëna yóreme, të jü Señor ä tempo úttiära yeu huémtay ä mënake, entok äbo ä yepsäpo ä

machiriay úttiata ä úhuaaka kaitapä tahuarianake.

⁹ İri juëna yóreme Satanásta éäpo yebijnake, buéresi útteaka, señaalim yore bāitattāhuame, entok kaa jaibu johuame jonake,

¹⁰ huame emo tārūnakeme bāitāu béchībo; huanāi ínēli huame lútūriata kaa huáatīame katim jínēutunake.

¹¹ Huāri béchībo Dios juka úttea am bāitāunakemta ámeu bíttua, huaka kaa lútūriata bem súalnakē béchībo,

¹² juka nokta jīokot machisi ámet chūpatunakē béchībo, sīme huame lútūriata kaa súalekame, entok juēnakuu aneka jība áma al-leame.

Jínēu béchībo yeu púarim

¹³ Tē itapo jība Diosta baisaupo yúmala enchim béchībo, hermaano Señorta nākēhuim. Diosta ániata naatekāpo naateka enchim yeu púuhuak, enchim jínēutunakē béchībo, hua Espíritu Santoy tü yáataka, jum lútūriapo Diosta enchim súalekā béchībo.

¹⁴ İāri béchībo enchim núnuk, İri tü nooki itom evangeliohui, itom Señor Jesucristota lóoria enchim jájammakē béchībo.

¹⁵ Júnēlituko, hermaanom, enchim jíapsi tutti yéchalatakem aane, éntokem juka doctriinata enchim majtiahuakau jíapsipo ěria, kía nokpo enchim jíkkajakāu entok itom jīojteripo enchim tàyakāhui.

¹⁶ Huanāi Áapo itom Señor Jesucristo, entok itom Dios Átchay, hua itom nákekame, entok ä

tühuay jíba béchïbo jíapsi al-leehuumta entok Diosta boobit-huumta itom mikakame,

¹⁷ enchim jíapsi kutti éetuanake, entok huitti éehuumta enchim máknake, enchim nokäpo entok tü tékilta enchim joäpo.

3

Jü Diosta noki úttilna

¹ Én éntok, hermaanom, Diostahuem oraciompo itom nok-ria, juka Señorta noki huitti huéenakë béchïbo, entok ä yörinä béchïbo, enchim násuk ä sikä bénasi,

² entok juéna yóremem násuk itom áma yeu huíknakë béchïbo; bueítuk Dios éehuumta kaa síme ä jípure.

³ Të jü Señor ä noki chúpanake. Útteata enchim jíputuanake entok enchim suayanake, kaa tühuaata bétana.

⁴ Entok Señortatte huitti éiya, huaka enchim joäu jíba enchim yáanake bétana, itom enchim át sáhuekä pámani.

⁵ Jü Señor áman enchim rúktianake, jum Diosta yore nákehui, entok Cristota bétana yánti éehuumta enchim máknake.

Jü tékilta yáanäu úttea

⁶ Én éntok, itom Señor Jesucristota téhuampote nésauta enchim mákka, hermaanom, huame jájana emo nüyemmak kaa enchim cháchätu sáhueka, itom enchim majtiakä bénasi kaa emo nüyemmaki.

⁷ Bueítuk eme jüneiya jáchin enchim násuk itom ito nukähui; ínëlem jíba emo nüye.

Bueituk ítapo kaa kía jájana ito nüka enchim násuku.

⁸ Katte jábeta kía jibuäriak, ál-late tüisi tekipanuaq, lótteka taahuapo entok tukaarit náa búrujti, kaa béttesi enchim béchibo obiachitu báreka.

⁹ Lútüriatate jípure jiope, të ejemplotate enchim mák báare, enchim ito bénasi emo núnaké béchibo.

¹⁰ Bueituk két enchimmak aneka íkái nésautate enchim mákkak: Jábe kaa tekipanua báareme, éläpo két kaa jibuänake.

¹¹ Bueitukte enchim násuk ä jikkaja, huatem jájana emo nüyëhui, ál-lam kaita bem jüneriäpo emo kikkima.

¹² Ímechite huitti nésahueka kutti nokta mákka, itom Señor Jesucristota téhuampo: kaitat jáchin éakam tekipanuaqa bem buänakeu kobanake.

¹³ Eme éntok, hermaanom, katem lótte tühuata joaka.

¹⁴ Huä jábe ä sáyhuaka páman kaa huée bárëtek, ímí enchimmeu jiojtekä pámani, áachem suuhua, éntokem kaa áamak emo chátcha; éläpo tiunake.

¹⁵ Katem omtihuäpo áu omtemta bénasä bitcha, ál-lem súamsi áu nooka, kuttílasi Cristota súalhuäpo tüisi ä huéenaké béchibo.

Diosta tü éeri yoret chúpahuame

¹⁶ Áapo Señor yánti jíapsihuamta yore mikame jiba enchim ä jíputuanake, juka yánti jíapsihuamta jita enchimmeu huéy junne. Jü Señor simemmak enchimmaktunake.

¹⁷ Ínapo Pablo íkái tebotetane ín mámammea yáala. Íri jü seña síme ín jiojteripo, íneline jíjiojte.

¹⁸ Huä tühua itom Señor Jesucristota bétana huéeme símemmak enchimmaktunake. Tua júnentunake.

Mayo

Mayo: Diosta nooki yorem nokpo New Testament

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 11 Jun 2026 from source
files dated 13 May 2025

84020f7b-8f34-5f65-803f-a2c6c92b92ea